

陳巖野先生全集

何耀光署



陳巖野先生全集

同里後學溫汝能 謙山 校輯

卷之三

五言古

七言古

五言律

七言律

南上述懷

人生際中晚譬若萍隨水禍福非所謀母令媿青史仁
義本何常蹈之則君子蹇余生不辰西北風塵起謀國
彼何人皇輿倏傾圯藿食雖無責良亦有餘恥所賴宗
社靈真人嗣豐芑湯湯橫流波半壁東南峙撫膺疏往
事血淚欲盈紙逝將瞻闕廷何必曾青紫客曰子何其
鰥生寧足齒士固各有志遑問譽與訾芻蕘如可獻亂
略庶有豸寄言謝同人但祝道如砥

又

薰風起南溟揚帆指京國授衣兼暑寒輕裝任羞澁親
聞旣捐棄遠遊今亦得中饋屬久虛有妾侍巾櫛兒女
各穉幼大者僅成立頗亦解大義不作牽衣泣但囑蚤
來歸母爲戀天邑我家本單微筆耕歲自給非關慕榮
膺其如值傾側亂流如未濟孤舟逝安適著書三十篇
字字揮血汁持此獻彤廷太倉餘一粒羣策倘輻輳濟
時尙有及微志苟獲伸懷哉卽家室

次荅曾清仲

皇造當震業中興方兆謀肉食豈無人所需在英猷往
事旣以誤蓬茅懷杞憂聞者粲然笑誰能念同舟庶幾

竭精誠感格明與幽二儀何附麗良亦氣所浮以茲捧
土微逝欲障狂流同人聞此行慰藉稱壯游挾琴佐素
酒商歌義兼優念子雖投閒乃心在凝旒築臺自隗始
庶以倡同仇離筵不盡醉委之置道周我懷如靡及非
以爵通侯

湏陽峽

雙峰若人立舉手相攀摘步障四十里愷崇勢均敵湏
水出其下石竅怒奔激南去滄溟深北上危峰遯磴道
雖新鑿猿猱愁絕壁往年罌牽夫山鬼至今嗅嶺外多
形勝險易相撤掖從王未厭紆禦侮貴其僻通道信云
功毋乃爲張趯勗哉慎設險罔俾生民螫

贛關接雲淙老師手書兼聞大疏 二首

天造鍾聖明敷求極南海先皇畱舊德蒼生望槐宰蹇蹇志匪他憂國我心痲聞變已趣裝主恩况踰倍出處有大義報稱如靡逮新銜例有辭良亦臣丹在小子庸何知遠咨及微猥途次奉誨言跂予望風采叱馭正駢駢雲臺方洒洒宏贊願蚤聞旂常炤千載

又

驅車靡晨夕川原不我與行行度贛關計旬已盈五緬昔發珠江聞者相枝拄夫子未心許乃亦不色拒躍冶固所矜譬之狂狷侶道路阻且長江皋日延佇珍重書中理進退愼所處匪爲一身謀而以觀幹蠱古人有大

略九九尙可舉言有重百朋亦有輕一羽孤懷惟自靖
遑知吐與茹傳聞多異辭沉憂切中腑勉旃卜此行豈
必隍梁父

訪宋鴻羽先生弗及

繁氣日乘除二儀何寥廓往世旣莫追來茲渺難度我
聞古哲人前知如炤灼於漢頌京焦於晉稱管郭史冊
傳其語而今不可作偉哉宋先生名理淵以博足跡半
中原神姿方矍鑠大者談廢興小之驗風角冥搜析糾
紛大義恣揮霍先幾告徵符已事悉如酢癸未歲先生
豫言國變
渺余謀面晚向往神先躍道韶聞動定抵虔云已邈不
後復不先相違惟一昔緬憶淩江道六日臥高閣何哉

阨良晤此病洵云瘧讐逆聚秦隴匈奴躡河朔庶幾聞
緒論於以起文弱草莽但杞愚至人猶屈蠖何時覲遐
踪高談叩冥漠

十八灘

章江十八灘天下聞絕險急湍怒若號怪石覃如剡大
者犀象蹲小者芙蓉颭輕舟睇兩岸迎眸如電閃篙師
誇利涉長年有餘歉誰移魚腹陣置此青山崦我觀古
贛城雲峰千萬點四藩稱上游叢箐存舊染所憂或馳
突豈患餘皇飭何因借秦鞭驅之執弧檠

去冬寇陷吉安諸孝廉自公車南還者棄舟走
他道間關僅達而余姻家馮介孚步自東甍輕

舟徑度余聞而壯之茲道出螺川覽觀形勢想
見夙昔經行之處可謂知兵矣因賦所懷以質
介孚

大江日夜流名城高翼翼云誰風鶴驚俄爲狂寇得舟
行斷往來聞者皆失色黔驢技幾何胡然空惕息隔江
有長道遙遙如矢直行樹相掩映翠巒紛可陟矧伊恫
喝初餘威詎能極褒衣仍緩步匪紓亦匪棘指顧俄出
險偉哉徵定力以茲審敵情彼已云胡忒何當建高牙
羣氛受徽纆

余以九月四日抵南州訪戴初士承惠尊人大
圓先生集及渡青閣愛廬諸刻次日取道西山

別後却寄

洪喬亦作郵

時致同社
龐升士書

信陵非一客半日豫章城匆匆

若遺跡含意各未申我行良獨迫南雁復相催詩才遽
殫索明發道西山低徊碍滕屨旅次乞膏火讀君渡青
閣先哲肇淵源風徽儼疇昔繫昔神皇季此道趨靡弱
山陰初濫觴揚波自夢澤後進轉慕效前修恣彈射陳
詩辨廢興悲哉忽如醉大雅未蕪沒匡山畱孔碩王李
浣其濃袁徐益其液所踈在千秋時流詎能度末學秉
微尙騶發亦同的托君窮海涯汲深慚未獲哲人不可
作堂構幸無斲中興屬伊始繁音宜蕩滌何因附莒杞
與君振標格

九月晦日

鄱陽秋水闊鳴鴈求其匹嗟我糟糠婦練祥俄已畢我行在遠道悲來難具述憶昔丙寅歲親命初受室貧賤共黽勉歷年十有七子男四乳具二女存其一汝棄阿虞去母子裁三日臨危片語無血腥染衣袂譬彼蓋臣節盡瘁忽罹恤子居無姑嫜呱呱環繞膝歲月漸云邈入戶如有失秋風動前林萬里氣蕭瑟咄哉杞人愚憂國豈其質跂余望故園兒曹初卽吉扁舟日遷延豈不懷親暱會當蚤還歸庭前戲梨栗

題湛文簡公書院兼懷如珩親家

江門振絕學文簡紹微言風範師百世遺澤在都門後

進欣所托俎豆久彌敦
繁昔明盛日儒耆侍天闈
公餘廼來者講席至今存
仰止訪遺蹟披尋徧邱樊
矧茲京國游彷彿覲槃墩
行邁愧弱植何當嗣淵源
徘徊讀書處南望憶聞孫

如珩頃年應薦讀書院中

寄臨川劉鍾台先生 二首

放勳詒峻德隆準啓炎籙
夫子神明胄風期曠相屬
綰符蒞南交芄苗餘霖霖
時修握手歡岩佚稀節目
三載晉容臺百粵懷涵育
宏濟諒匪他豁達良已足
徘徊眺高旻星漢互暉燭
時艱已宏多至人在空谷

又

士有不得志閉戶塵凝几
驅車駕言邁念年不踰里
草

莽懷杞愚中宵頻徙倚馬齒日以長然疑互相訾居圉
屬多虞安能爲園綺飛鳥艱羽毛國士慚知己悠悠望
江鄉所思若庭肥毋然戀巖阿勉爲蒼生起

贈梁漸子

四首

徑寸明月珠遠在南海滄一朝登廊廟萬乘揚光輝物
產固無盡重輕各有時聖明寶得賢川岳氣應之有美
方茂齡蛟宮失其奇古道深自朂高文列鼎彝對此希
代質顧我爲小璣嗜欲會將至光怪方陸離願言獻天
子南琛良在茲

又

有懷不自喻無金喜結客志意匪恒期時以寄吾跡所

思如有人求之不可得及門曾子固於君爲夙昔聞聲
已相思耿耿在中隔九年春正月夜光皎如璧醉裏從
羣謝座中猶別識遲明讀君書讀之動顏色薰以蘭薰
膏崇以珠翠飾令質本自妍區區非所益帳中不敢秘
服膺永無斃

又

大雅屬榛蕪小言多破道獨行徒侶稀時復孤懷抱志
士謝衆睎千秋忝元討俛首爲制義不如古文好近猶
凌晉魏遠乃追雒鎬渺思入青冥瞻矚周渾灝同時陸
浚儀一見驚絕倒憶我如君時懷古意如擣餓驅謀旦
夕十年坐草草窮達知有時立志悔不早所願行其言

毋爲但詞藻

又

海氛初就平，驕敵猶匪茹。潢池有弄兵，逋誅在秦豫。
材官非不足，往往煩召募。司農憂轉餉，反裘未遑顧。
遂使聖躬勞，況也諸曹署。草茅空有懷，所守在章句。
溫飽非良圖，毛錐復何與。子房信文弱，乃復多智數。
懷哉圯石人，斯人良可慕。君如對承明，何以借前箸。

漸子所著有圯石人藁

送葉公士還吳

越海浩茫茫，涵虛王百谷。自昔神山浮，峰巒削蒼玉。
別島不知數，海上如鳬浴。葉子自北來，三年鳳城曲。
鳳山鬱嵒嵒，鑑江環其麓。石橋臥長虹，波光炫綺縠。
五月荔

子丹樗火燄相燭冬氣仍暄暖巖岫多卉木少府官署
閒清歌時互屬談元對大阮論文兼小陸山川有元賞
半作邱索讀我聞漢腐史文章寄馬足遊興渺無際南
盡湘陵竹百粵時未通五嶺苦羈束君今賦倦遊歸途
幽勝熟片帆發香浦暮雨迷中宿三峽指庾關啼猿聲
斷續囊貯羅浮去山靈共追逐長嘯揖龍門回頭謝帝
儵睠言交游中臭味互芬馥所恨相見晚如何分袂速
丈夫志四方羣聚豈麋鹿中原大如斗攬之不盈匊誰
能向戶牖終日長齷齪聯合未足論肝膽遙相勗會當
騁亨衢萬里恣遊目

夜別

予子江上踪過從何寂寞有美婉清揚驅車破牢落談
諧未幾語乃復輕然諾感茲綢繆意駕言采芳葑名園
盛主賓斗酒相娛樂風流映坐隅中夜聽絃索酒闌忽
遐舉此過乃不惡悠悠城上烏矯矯雲中鶴晨風四面
起淒其倍于昨大黃遄問津小黃臥高閣睠焉不可畱
浩歌返南郭握手勞相將分攜意惋愕寒衾不帖席明
月滿屋角乃知意氣急反爲交游薄

夢母

東風入江樹古巢發新枝有鳥將二雛中道失其雌大
雛就口食小雛鳴且悲感之涕如雨念我靡依時悠悠
八年所冥漠恫餘思峽江匪云遠昨夜夢見之睠焉問

婚嫁標梅當及期念子方食貧何以爲行資含顰拜稽
首妹氏今遠離嚴親重願養家督敢言疲同氣亦無幾
黽勉分所宜聞言似顏解撫慰不能辭明發一追省蒼
茫霑我願幽明渺以隔精爽嘗相隨生事尺寸間俯仰
愧埤遺鴈鳴桃花發母也重猶夷荏苒日斯邁胡然天
一涯不能慰重泉安用生兒爲

黃又生先生開府吳淞作此寄懷

皇風播清醇重熙愛方國底貢極東南控弦勁西北悠
悠炎海濱繁星拱辰極繫昔際神君撫循洽文德惠與
鑑川流五峰增勃律治行揆皇鑒風采奮白筆周咨勤
四壯天開麗卿月帝曰汝股肱往哉鎮吳越吳越三江